

Di Sekant Leta weh di Apasl JOHN Rait

Weh dis buk deh taak bout

Iina di sekant leta weh di Apasl John rait, ihn kaal ihnself “di Elda” ahn ihn rait ihn leta tu sombody weh ihn kaal “di Dier Liedy ahn fi shii pikniny dem.” Ahn dis kuda miin wan luokal chorch ahn di chorch memba dem. Di shaat leta deh inkorij dem weh get dis leta fi lov wan anada, ahn fi waan dem bout demde faals tiicha weh deh yah mongs dem ahn dehn rang tiichin.

How dis leta set op

Introdokshan1-3

Lov wan anada4-6

No fala weh faals bot fala di chruut7-11

John laas wod dem iina dis leta12-13

Di Apasl John rait wan leta tu wan a ihn chorch dem

¹Dis leta dah fahn mii, John, weh dah di uol elda iina di chorch. Ah deh rait dis leta tu wan speshal uman ahn ihn pikniny dem weh Ah ongl lov. Ahn dah no ongl mii lov unu, bot dah evrybody weh nuo di chruut, lov unu tu. ²Wi lov unu, bikaaz di chruut liv iina wii, ahn ih gwain deh iina wi haat fareva! ³Wi prie seh God di Faada ahn ihn Son, Jesus Christ, gwain gi wi gries, ahn morsy, ahn piis iina fi wi haat. Ahn demya tingz gwain deh wid wi, weh nuo di chruut ahn weh lov wan anada.

Chruut ahn Lov

⁴Ah wehn so hapy wen Ah hier seh som a yo pikniny dem deh fala di chruut, jos laik weh wi Faada tel wi fi du. ⁵Ahn so, dier uman, Ah deh

beg yo: Mek aala wi lov wan anada! Ahn dis komaan weh Ah deh rait, dah no non nyuu ting. Dis dah weh wi nuu fahn wen wi wehn fos biliiv. ⁶Dis lov, weh Ah deh taak bout miin seh, wi fi liv iina wan wie dat wi obie weh God tel wi fi du; wii fi liv wan laif deh lov ahn rispek wan anada jos laik weh wi wehn hier fahn di biginin! ⁷Bot wan paila bad tiicha weh gaan out uova di houl worl fi fuul'op di biliiva dem. Demde kain a tiicha no waahn biliiv seh, Jesus Christ wehn kom iina di worl az wan hyuuman bi'in. Pipl laik demde no deh taak di chruut; dehn dah Christ enemy fi chruut!

⁸So den, unu fi tek kier seh unu no laas weh unu don work fah, bot unu fi get aala demya tingz weh God wehn pramis unu. ⁹So, if enybady kom deh tiich ahn deh ad aan muo an weh Christ wehn don tiich unu, den unu gwain nuu fi shuur seh, dehn no gat notn fi du wid God! Bot, if dehn kantinyo deh kiip Christ tiichin dem, di Faada ahn di Son gwain deh wid dem. ¹⁰Ah seh agen, if somebody kom tu unu ahn dehn no kom wid di chruu tiichin, no gat notn fi du wid dem —nat iivn welkom dem iina unu hous. Unu no iivn fi hiel dem niida, ¹¹bikaaz enybady weh welkom dem, dah dem fren; ahn so, unu gwain deh tek paat iina di wikidnis weh dem deh du!

John laas griitin dem

¹²Ah gat wan paila tingz stil yet fi tel unu, bot Ah no waahn rait dem dong pahn piepa ahn ink. Insida dat, Ah huop fi go si unu, ahn taak tu unu fies tu fies, ahn dat dah di ongl ting weh gwain mek wi rijais fi chruut.

¹³Unu sista pikniny sen heluo fi unu. Amen!